

EZEQUIEL

Hawě unāmati hātxaki

Ha ano 597 Cristo huriamatiã Judá enabu Joaquim hatu shanē ibuhairashunaya hanua Deusbe hawenabu hātxashunika Ezequiel Babilônia anu Nabucodonosorī hatu iyuni hari hawenabube hiwea hawē hātxa yuishunika wakī Senhor Deusū Ezequiel katunikiaki. Caldéia nawabū mai pakekauana anu hawenabu iyunibu hiwebaunabu anu Senhor Deusū hātxa Ezequiel hatuki txanikūkaini inū, Jerusalém txakabuwakī keyunibu anu habu ana txītūshanaibukiri Ezequielī hatu banabimakī inū, hatū yushibu dami kēwākī beyawanibu hatu putamakī ana Senhor Deusū hatu txītūmashanai Ezequielī hatu yuiriakubainikiaki.

Hawē tsautiki Deus tsaua Ezequielī uinikiaki, na hātxarã

1 ¹Ha shaba 5 inū, ushe 4 inū, ano 30tiã Babilônia anu Nabucodonosorī enabū hatu iwenibube ea Ezequiel ē hiwea shaba betsatiã hene hawē kena Quebar kesha anu ē nikē nai bepemanakainai anua nama keskakī Deus ē uiniki. ²Ha haskairã, Babilônia anu Judá enabū shanē ibuhaira Joaquim iyuyamabu ma 5 ano kaitianã, ³ea ē Buzī huni bake Deusbe enabu ē hatu hātxashunika Ezequiel anu Deusū hawē hātxa ea yuiniki, Caldéia nawabū enabube hatū mai pakea anu ea iwenibu Quebar hene kesha ē nikē hanushū Senhor Deusū hawē kushipawē ea meniki. ⁴Ea meaya nortekiria niwewã kushipahaira meshu mayakabirani beai ē uīāyã nai kuī anua kana bakai keskai txi tashnibirani puabaunaya txashahaira baka baka ikai merã mane txasha txasha ikai keska ⁵ha namakis uke meranua huni kuī itsa dabe inū dabe hiweabu ē uīyamaki. ⁶Habu tibirã, hatū bushka anu dabe inū dabe besuya inū dabe inū dabe pei hayabuki. ⁷Habū kishi yushtuma ina awa bakē hūtsis keskabuki. Ha habū hūtsisrã, mane bronze tashipa dekē hi hi ikai keskabuki. ⁸⁻⁹Ha dikabi habu dabe inū dabe besuya inū dabe inū dabe peiyaburã, ha hatū pei tsamia namã hatū pishkī nata merã hatū mekē dabe inū dabe tsamia hayabuki. Habū pei tibirã, meshti ibukunaki.

Habu mapuirã, hawa txĩtuãma hariris bumisbuki. ¹⁰Habũ besu betsa betsapakiri matu yuinũ nĩkakãwẽ. Ha hiweabu dabe inũ dabe tibi 4 besuya betsa ha dukunã, huni kuĩ besuki. Yusiurirã, inu betsa leão ewapatũ besuki. Ukeri yusmauri ina awa benẽ besuki. Ukeri petxiuri nawa tete besu hayaki. ¹¹Habũ pũyã peiyarã, daberã, manaũri peshaki. Dabe betsarã, pei meshti ibaunaki. Ha pei dabewẽri ha tibitũ hatũ yura bepuabuki.

²²Ha hiweabu mapubaunabu nai hatu mamaki dunua anu hawara hene keska txashahaira hayaki. ²³Ha nai namanã, ha hiweabũ pei peshai pũtei meshti ikabuki. Ha tibitũ hawẽ pei betsa dabewẽ hatũ yura bepuabuki. ²⁴Haska uĩkĩ ã nĩkaya hatũ peiwẽ mapua buirã, hene bai mata txakayama kushipamis keska hawẽ huiki. Ha haskarã, Deus kushipa dasibi binuatũ hui keskai inũ, detenamenikabu mirimahaira kushibainaibu keska habũ pei shũ shũ ibaini ha hiweabu haskabaini niti ika mapua niti itã hatũ pei utsi waibũ ²⁵habũ bushka masuatũ nai dunua mamakia hui kushipa tashniaya ²⁶ha nai dunua mamakia uĩkinã, shanẽ ibũ tsauti bishtu nãketapa beshnahaira keska anu ha tsauti anu yura kayabi keska tsaua ã uiãyã ²⁷ha huni keska hawẽ natu manãkiri ã uianã, txi anu matxatu shuia kuhairai dekẽ dekẽ imis keska ha huni keska hawẽ natu maikiri txi hayariki. Ha haskatũ yabu keyubauna txasha txasha ikikiki. ²⁸Ha dũkebauna txasha txasha ikai anu ui itã nawã bai tapimis keskai nai kuĩ anua Deusũ kushipa hawẽruahaira hui tashnikainaya haska Senhor Deus txasha txasha ikai ea uĩmai uĩtã kẽwaĩ dãti iki maĩ beti ika ã dakakẽ,

Deusũ Ezequiel katutã yununikiaki, na hãtxarã

2 ¹hanushũ hawẽ hui tashniai ã nĩkaya ea yuikĩ: “Miarã, mĩ huniki. Beniwe, ã mibe hãtxairã”, ea waya ²ha hui kaĩkĩ ea hãtxa waya habiatiãri hawaira Deusũ Yushĩ kushipa ea merã hikitã ea benia ã nikẽ habias huiwẽ ea hãtxa washu ana ã nĩkaya ³ea yuikubaĩkĩ: “Mĩ miaki, hunirã. Ë mia yunuai Israelĩ enabu ea hatu yuishũtãwẽ, habũ ã hãtxa nĩkakĩ txibaĩsbuma patapabũ ea danaĩ eki sinatamisbu anurã. Hatũ shenipabũ ea danãkĩ taewanikẽ na habiatiãri habũ bababũri ea danãriakubaĩkanikiki. ⁴Hamẽ hatũ bakeburã, huĩti kushi inũ bushka kushi shinã betsa wakatsi isbuma anu ã mia yunuai. Kashũ hatu yuikĩ: ‘Senhor Deusũ eska matu yuikiki’, ⁵mĩ hatu wa mia nĩkakanimẽkaĩ, mia nĩkabumamẽkaĩ, ha huniburã, nĩkaisma sinatapabuki. Habu haska hiwebiakẽ mia mĩ Deusũ hãtxa yuishunika mĩ hatube hiwea habũ unãshãkanikiki. ⁶Mia mĩ hunirã, habuki dateyamashãwẽ. Ë hãtxa mĩ hatu yuibia haburã, eskabũ mia atxia mĩ hiweshanai. Mushã mia yabubauna keska inũ nibube mĩ hiwea keskashanaiwẽ taea hatuki mesei dateyamashãwẽ. Haburã, nĩkatirubuma sinatahairabuki. Haskawẽ

taea habū hawara yuikī mia datetirubuwē e iki dateyamashāwē. 7Ē hātxa danāhairai eki sinatamisbū mī hātxa mia nīkakanimēkaī, mia nīkabumabiakē habiaskabiakē ē hātxa hatu yuikubaishāwē. 8Hawara ē mia yuiai nīka pehaira wawe, hatu keska sinatapakī ē hātxa danāma hawara ē mia inaī hashpatā mukukī piwe”, ea waya

9hanushū mekē tashnimabirākī una kene sebi tsuma haya ekiri sanābiranai ē uiāyā 10ea bebūshū ha una sebi txureai uke bukū keneya kashai bis ikai kene haya inū, isī mei bika teneai kene haya inū, pubē hātxa kene haya ē uiāyā

3 1hanushū ea yuikī: “Mianā, na una keneya piwe. Haska watā Israelī enabu hatu hātxa wakī uī kariwe”, ea wakī

2ea hashpa watā ha una keneya hatū ea pimakī 3ea yuikī: “Na una keneya ē mia inainā, pikī sheawe, ikisrā. Yaniwakī mī hatu mata wawe”, ea wa

eā pikinā, hawē nis buna bata keska ē meimaki. 4Hanushū ea ana yuikī: “Kashū haska Israelī enabu ē hatu haska yuikatsis ikai ea hatu yuishūkubaiwē. 5Yura betsabu hatū hātxa hunea bika mī tapītiruma anu ē mia yunuamaki. Hakia Israelī enabu anu ē mia yunuaii, hatū hātshawē mī hātchai anurā. 6Yurabu betsa betsapa mirimabu anu hatū hātxa itimaska inū bika mī tapītiruma anu ē mia haskanu yunuamaki. Habiaskabiakē habu anu ē mia hatu yunua habū mia nīkatirubu ikeanaii. 7Hamē mia hanu yunuama ha dasibi Israelī enabu huīti kushibu inū besu kushibu habū ea nīkaisbumawē taeshū miari nīkama ishākanikiki. 8Hakia habu keska ē mia wariiai, mī besu inū mī huīti mia kushi wakinā. 9Ha nēkati diamante keska wakī ē mia kushipa washanaii, mishki betsa kushipa binua keska wakinā. Ea danā paepa wamisbuwē taeshū hawara mia bebūshū yuiaibu hatuwē taea teku iki dateyamakūkaishāwē”, iwanā,

10ana ea yuikī: “Dasibi ē mia yuai pes nishū nīka pehaira wakī mī bushka merā netāwē, hakimatimairā. 11Minabu Babilōnia anu iwenibu hatu uī kariwe. Mia nīkatirubumēkaī, mia nīkabumabiakē: ‘Senhor Deusū eska matu yuikiki. Nīkakāwē’, iwanā, ea hatu yuishūshāwē”, ea wa

12hanushū Deusū Yushī kushipatū ea benitā ea dūtābainaya ea katxū Senhor Deusū shātu anua hawē kushipa txasha txasha iki benikainaya mai patxa sakui keskai unāshubima dāka ikaīkaini keska ē nīkaya 13ha hui dāka ikirā, ha 4 hunibū pei nuyabaini shū shū ibainai anu hawē tarābaīti tae hatū yuraki tsamiāwē buirā, unāshubima tī ikaīkaini mai patxa sakuhairai keskaki. 14Deusū Yushinē ha ē nia anua ea nuyābaīkī ea iyukī Senhor Deusū hawē mekēnē ea tsuma txakayamashū ea iyua punu nuka sinatayabi dunukaini kai 15Hene Quebar kesha anu ea butea Israelī enabu Babilōnia anu hatu iwenibu mae betsa Tel-Abibe anu hiweabu anu hikitā hanu 7 shaba ea hatube hiweyushū ē hawa unāmawē taea ē hawa watiruma inū ē hawa hatu yuitiruma ikaya

**Israelī enabū txakabuwaibu hau hatu nemanū Senhor Deusū Ezequiel
uinika katunikiaki, na hātcharā**

(Ez 33.1-9)

¹⁶ha 7 shaba keyuaya Senhor Deusū ana ea yunukī yuikī: ¹⁷“Miarā, Israelī enabū hatū txaninika ē mia waii. Hanushū haska ē hātxa bebūkiri ē mia yuia hatu unāmakī ea hatu banabimashūkubaīshāwē. ¹⁸Eskakiri ē shinaī ea nīkawē. Tsuara ha txakabuakiri ē kupitiwē hau mawanūbū ē hakiri mia yuia hawē txakabu henetā hau hiwekūkaīshanū nemakī mī hawa hatu hātxa wama, hawē txakabuwē taea mawashanikiki, ē kupiarā. Hakia miā kanekī tsuara hawē txakabukiri nemakī mī merabewama ma mawakē hawē taeshū ē mia kupishanaii. ¹⁹Hakia tsuara hawē txakabukiri yuikī mī nemaya hawē txakabukiri shinā betsa wama hawē txakabu heneamawē taea mawashanikiki, ē kupiarā. Hakia mianā, mī hatu nemakī shinā betsa wamashinawē taea mī hiwea mī mekeshanaii. ²⁰Haska inū, betsa ē shinainā, tsuāra ea nīkai pepabiakūkaini hatū pepa henetā ana txakabuwakubainaibū mesekiri ē hatu yunua bui huti ikai di ikabu keska nemakī mī hawa hatu hātxa wama hatū txakabu heneabumawē taea mawashākanikiki, ē hatu kupiarā. Hatū pepa akubainimabukiri ē ana shināma hatū txakabuwē taea mawaibū hakia miā kanekī mī hatu nemama ishiāwē taeshū ē mia kupishanaii. ²¹Hakia hau txakabuwayamanū nemakī bebūkiri mī shabakabi yuia mia nīkatā ana hawa txakabuamawē taea hiweyushanikiki, ē ana kupiamarā. Bebūkiri mī hatu yuishinawē taea hamē miarā, ibubis mekei mī hiweyukūkaīshanaii”, itā,

Senhor Deusū Ezequiel huyu wanikiaki, na hātcharā

²²ea haska hātxa wakī hawē kushipawē ea mekī Senhor Deusū ana ea yuikī: “Nenua benikaini kairā, napāpakiri kawē, haria ē mibe hātchairā”, ea wa ²³benikaini napāpakiri kashū Hene Quebar kesha nishū haska ē uīma keska harishūri Senhor Deusū kushipa txasha txasha ikai ana uī dāti iki maī ē beti ikē ²⁴hanushū Deusū Yushī kushipa ea merā hikitā ea benia ē nikē Senhor Deusū eska ea yuikī: “Kai mī hiwetā hikitā mī hiwe beputi beshetāwē. ²⁵Uiā. Mī hiwe anua mī kaīkaīyamanū dispiwē habū mia binesh shanikiki, kaīkaina mī ana yurabube niyamanunā. ²⁶Ha dikabi eanā, mī ana hāttxatiruma wakī mī hāshakakī mī hana ē mia tsāpa waii, mī huyununā. Habū ē hātxa danābiamisbū hatu ha akī mī hatu pewatiruma ishanaii. ²⁷Hakia hawara ē mia yuimakatsi ikaitiā ē mia ana hātxa pesamakubaīshanaii. Hanushū hatu yuikī: ‘Eska Senhor Deusū matu yuikiki’, iwanā, mī hatu ea yuishūkubaīshanaii. Minabu hawa nīkaisbumawē taeshū tsuabūra nīkakatsi ikī nīkakubaīshākanikiki. Hakia tsuabūra nīkakatsi ikabuma hau nīkayamakubaīshanūbūwē”, akī ea haska waniki.

Deusū huni unāti waya ibubis pe mekekubaītirubukiaki, na hātcharā

18 ¹Ana Senhor Deusū ea hātcha wakī yuikī: ²“Israelī enabū hatū beya txakabu atiani habias txibākī heneama yuikī: ‘Uva bimi būkash pia keska wakī hatū epabū txakabuwakubainaibu hatū sheta masheshai keska hatū bakebu nuitapai bika tenekubaīmisbuki’, haska hātchai haskakī Israelī enabū haska yui beshtekeriabumamē? ³Ea ē Senhor Deus ē hiweawē taea ibubis ē yubakairā, matubu Israelī enaburā, na haskakubainaibu hātcha henetā ana txītūkirā mā yuiama ikūkaīshanaai. ⁴Huni inū aību dukū ē dami waniwē taea dasibibu enaski, hatū ibubu inū hatū bakeburā. Haskawē taea haratutūra txakabuwatā ibubis hawē txakabuwē taea mawakubaīshākanikiki, ē hatu kupiarā.

⁵Hamē huni pepabu ikirā, eskamisbuki. Paranaaisma inū txanitxakaisma ikubaīmisbuki. ⁶Hawenabū beya mati meribi anushū yushibu dami kēwaību anushū hatubetā pi txakabukūkaīisma inū, kanekī Israelī enabū mekenika yushibu txani duawai haki txiti isma inū, hatu dapi hiweabu hatū aī hawa hatu meisma inū, hawē aī himi ikai txutaīsumarā, ⁷ha dikabi, hawa tsua itxakawaisma inū, hunī diria ma pakakē hawē mabu biaīma huni pepabū hawē mabu hatu ana ināmisbuki. Hawa betsa taska hatu yumetsuamarā, hanushū nuitapai buniaibu hawē piti hatu pimamisbuki. Ha inū, huni betsa tariuma uīkī hatū tari betsa hatu ināmisbuki. ⁸Ha dikabi pei ināshīshū hawena wakī ana shekaisbumaki. Hawa tsua bika tenemaīsumaki. Hanushū hawarawē taea yura dabe ha ikaibu kaneama pepawē besti hatu unāti wamisbuki. ⁹Ha huni peparā, ē yunuti hātcha inū ē nemati hātcha shinākī ē yusīti hātcha dasibi txanima txibākī tsua hatu paraīisma ha huni pepa kayabibuwē taea pe hiwekubaīshākanikiki, ē hawa hatu kupiamarā. Ea Senhor Deusū txanima ē hātcha ē mestēwaiī.

¹⁰⁻¹¹Hamē ha huni pepabiakē hawē huni bake betsā hawē epā shinā txibākī akama na haska tibi mei txakabukūkaini haska hawē bake ē uītiruki. Hawaira sinatai detenamei inū, yura betsa tenainā, ha inū, mati meribi anushū hawenabū yushibubu dami kēwaībubetā pikubaīmis inū, ha dapi hiweabū aī txutamis inū, ¹²nuitapaibu inū hawa hayabuma itxakawakī merabewaisma inū, yura betsa betsapabū hatū hawara yumetsumis inū, huni betsā diria ma pakabiakē hawē mabu biaīma ha yaushikī ana inaīisma inū, mekenika yushibu txani duawakī kēwāmis inū, hawara betsa betsapa ē betxipaiama akubaīmis inū, ¹³pei ināyutā ana hawena wakī binumakī itxapa watā yukamisburā, haskaburā, hiwetirubumaki. Hawara dasibi ē betxipaiama akubainiawē taeshū shanē ibubū hau kupikī tenāshanūbūwē, tsuā hawa hatu nemamarā. Iubis ha huni hatū shinā txakabuwē taea mawashākanikiki, ē hatu kupimarā.

¹⁴Hamē huni txakabū bakebia hawē epā txakabu akubainai uībiakī hawē hiwea txibaīisma eskatirubuki. ¹⁵Mati meribi tibi anushū yushibu dami

kēwātā pimisbube itxaisma inū, kanekī Israelī enabū mekenika yushibu txani duawai haki txiti isma inū, ha dapi hiweabū aī hawa meisma inū, ¹⁶tsua itxakawaisma inū, pei biāyuaya hau pakashū bishanū, iwanā, hawē mabu betsa biaisma inū, hawara tibi hatu yumetsuismarā, hafia hawē piti pashkatā hawa hayama buniaibu hatu ināmis inū, tariuma nuitapaibu hawē tari betsa hatu ināmis inū, ¹⁷hawa tsua itxakawakī txakabuwaisma inū, pei ināyutā ana hawena bikī shekakī yukaismarā, ha hunī haska wakinā, ē yunuti hātxa inū ē nemati hātxa shinākubaīkī ē yusīti hātxa txibaī hatū ibubū txakabuwē taea hawa mawama ishākanikiki, ē hatu hiwemakubainarā.

¹⁸Ha inū, betsarā, hatū epā hawenabu itxakawakī hatu yumetsukī kanekī txakabu betsa betsapa wakubainaya hawē txakabuwē taeshū kupikī hau tenāshanūbūwē. ¹⁹Hafia matubu yuka iki: ‘Haskakī hawē huni bake nū kupiamamē, hawē epā txakabuwē taeshunā?’ mā ikaya eskaki. Matu yuinū nīkakāwē. Hawē huni bakē ē yunuti hātxa inū ē nemati hātxa shinākī ē yusīti hātxa txibākubaini hatu paraisma inū txanitxakaismawē taea txanima hiweshanikiki, ē merabewakubainarā. ²⁰Hamē betsarā, tsuāra txakabu besti wakubainai habu besti mawashākanikiki, ē hatu kupiarā. Hatū epā txakabuwē taeshū hawē huni bake hawē kupitiwē hatu tenātimaki. Habiaskari wakī hawē huni bakē txakabuwē taeshū hawē ibu kupitimariki. Tsuāra pepa akī haska Deusū betxipaimis txibāmisbū manakuti pepa bishākanikiki. Hafia tsuāra txakabu betsa betsapa akubaīmisbū kupiti txakabu bishākanikiki”, itā,

**Senhor Deus kaneismatū pepa waibu inū txakabuwaibu unātā hatu
kupishanikiaki, na hātstrarā
(Ez 33.10-20)**

²¹“Hunibū txakabuwabiakubaini hatū txakabu hene keyutā ē yunuti hātxa inū ē nemati hātxa shinākubaīkī ana kaneama pepas akubaini hiwekubaīshākanikiki, ē kupitiwē hawa mawamarā. ²²Ha hunī haska txakabu akubaini eā ē ana shināma ha huni pepakī ea uīmaiwē taea ana hawa dateama hiwekūkaīshanikiki. ²³Hunibu txakabu hatū txakabuwē mawaibu ē betxipaiamaki. Hafia shinā betsa wakī hatū txakabu henetā hiweaibu ē kupitiwē hawa dateama hau hiwekubaīshanūbū ē betxipaimiski. Ea Senhor Deusū ē hātxa txanimawē ē mestēwaiī.

²⁴Hafia tsuara pepai hiwebiakūkaīmistū hawē pepa hene keyutā txakabu dasibi inū hawara ē betxipaiama ē danāmis akubainiburā, ē hatu kupiama hiweyukūkainai dabanē mā shinaī? Haskamaki. Haskai pepa hiwekūkainima ē ana shināma ea ikūwai henei txītūtā ibubis hawē txakabuwē taea hau mawanū ē kupishanaii. ²⁵Ea ē pepa bestiwē ē matu mekebia matū shinā txakakī mā ea txitemisrā, matu yuinū nīkakāwē. Matū yuikī: ‘Senhor Deusū nuku pewakubainamaki’, mā ikaii. Hafia

mã Israelĩ enaburã, ẽ eamaki, txakaburã. Hakia ea binumakĩ ea nĩkama mã txakabuwasibuki. ²⁶Huni pepatũ hawẽ pepa henetã txakabukũkainairã, ibubis hawẽ shinã txakabuwẽ taea mawashanikiki, ẽ kupiarã. ²⁷Hakia huni txakabũ hawẽ txakabu henetã ana parananãma inũ txanitxakama ikũkaini hawẽ hiwea pashashanikiki, ẽ kupiamarã. ²⁸Hamẽ betsarã, tsuãra hawẽ txakabu betsa betsapa unãtã henekĩ shinã betsa watã txanima hiweyushanikiki, ẽ kupiamarã.

²⁹Ë Senhor Deus mã Israelĩ enabũ ekiri yuikĩ: ‘Senhor Deusũ pepawẽ nuku mekeismaki’, mã ikaya haskakĩ ẽ yunutiwẽ ẽ matu pe hiwemaismamẽ? Hakia mã matumamẽ, pepa aki mã hiweismarã? ³⁰Mã Israelburã, matu tibi haska mã hiwemismwẽ taea eã ẽ matu unãti watirumamẽ? Ea Senhor Deusũ ẽ hãtxa txanima ẽ mestẽwaiĩ. Ibubis mã ea sinatamabiamis hawẽ taeshũ ẽ matu kupiyamashanũ matũ txakabu dasibi hawaira hene keyurikãwẽ, hamẽ matũ hiwea mã benuyamashanunã. ³¹⁻³²Ea sinatamakubaĩkĩ matũ txakabu haska mã akubainai henetã shinã pepa shinãkĩ yushĩ pepa bena bikubaĩkãwẽ. Tsua mã mawayamanũ, iwanã, ẽ betxipaiamawẽ taea Israelĩ enabuũ, kupia yumaĩ haskai mã mawashanai? Matũ txakabu hene keyutã hiwei perikubaĩkãwẽ, ẽ hawẽ taeshũ ẽ matu kupiyamashanunã. Ana txakabuwama hiwei pe bestikubaĩkãwẽ, akĩ ea Senhor Deusũ ẽ hãtxa txanima ẽ mestẽwaiĩ”, ikaya ẽ hatu yuishuniki, Israelĩ enaburã.

Haska Senhor Deusũ hatu merabewashanai Israelĩ enabu yuinikiaki, na hãtxarã

36 ¹⁶Ana bari betsatiã Senhor Deusũ ea hãtxa wakĩ yuikĩ: ¹⁷“Israelĩ enabu hatũ mai pakea ẽ meribi hatu inãni anu hiweshũ txakabuwakubaini atimapakĩ ea betxipaimama inibuki. Haskai hiwekubaĩkĩ hatũ mai pakea atimapa detsis keska waibũ haskaibu ẽ hatu danãhairaniki. ¹⁸Hanushũ hatunabu betsabũ hawa hatu wabumabia e iskaũ hatũ mae anushũ hawenabũ hatu detekubainaibu inũ, yushibu dami kẽwai haki beamaibuwẽ taeshũ ea hatuki sinatakawã ¹⁹ha hiwe txakakubainaibuwẽ taeshũ mai pakea betsa betsapa anu nawabu habũ unãbuma anu eã hatu itxakawayukĩ ẽ hatu sa akĩ keyuniki, hatũ txakabuwẽ hatu kupikinã. ²⁰Hakia hanira nawabũ enabu hatu iyukĩ hatũ mae anu hatu bitxitã ẽ kena meribi habukiri yuikĩ: ‘Narã, Senhor Deusũ enabubia hatũ mai pakea anua hatu tashnimabirãkĩ nenu hatu iwenibuki’, hatu akubainaibũ ²¹hatu atxitã iyukĩ mae betsa anu hatu bitxiabũ Israelĩ shenipabũ txakabuwẽ taeshũ nawabũ ẽ kena meribibiakẽ ea hatu yuãmaibu nĩkakĩ uĩ ẽ bika tenehairakubainai.

²²Haskawẽ taeshũ Israelĩ enabu ea hatu yuishũtãwẽ: Eska Senhor Jeová matu yuikiki, akinã. Israelĩ enabuũ, haska akĩ ẽ kushipa ẽ tashnimashanairã, matu merabewanũ, iwanã, ẽ akamaki. Hakia hanira

nawabu anu bushū ekiri mā hatu txakabu hātxamakubainai ē kena meribi unākī hau habūri ea unāshanūbū ē ashanaii. ²³Hatu anushū mā ea txitekī yuābiaya ha nawabu bebūshū ē kena meribi kushipa ē hatu uīmashanaii. Ē hatu haska washuna ea uī ea besti ē Senhor Jeová habū ea unākubaīshākanikiki. Ea Senhor Deusū ē hātxa txanima ē mestēwaiī. ²⁴Mai pakea betsa betsapa anu nawabu tibi anu matu iyunibu anua matu ana ikī itxawashū matū mai pakea anu ē ana matu txītūmashanaii, hanu mā ana hiwei bushanūbunā. ²⁵Ūpash kayabi beshnahairawē matū beya betsa betsapa detsis keska ē matu txukashanaii, mā yushibu dami kēwaiī mā atimapamis tibi matu tere akī keyukinā. ²⁶Matu haska watā huīti anu shinā bena inū ē yushī kushipa bena ē matuki mistushanaii, ha matū huīti kushi mishki keska tsekātā huīti nuikipa mistukinā. ²⁷Matu merā ē yushī mistushū ē yunuti hātxa inū, ē nemati hātxa inū, ē yusīti hātxa mā hawē hiwekī mā ea uinūbū ē matu txibāmakubaīshanaii. ²⁸Ha mai pakea betsa matū shenipabu ē hatu ibuwamani anu ana mā hiwekūkaīshanaii, mā hari ana hiwea mā enabuwē taea eari ē matū mekenika Deus iriakūkaīshanaii. ²⁹Harishū matū beya txakabu betsa betsapa ē matu putamashanaii. Matū shekiwā trigo matu hamē ashūkī ē ana matu buni yunuama ishanaii. ³⁰Ha dikabi hau yurabu hiwebaūshū matu uīkubainūbū buni paewē mā ana dakeyamashanūbū matū mibā hi inū matū bai anu mibā tibi bimihaira ē matu washūkubaīshanaii. ³¹Hiwetxakakī mā txakabuwakubaini shinaī, ea danaī mā atimapakubainiwē mā ibubis dakekubaīshanaii. ³²Israelī enabuū, ea Senhor Jeová ē hātxa txanima ē mestēwaiī ea nīkakāwē. Na matu eska wakinā, eā ē shinanē, ē matu akamaki. Haska mā betxipaii keska ibubis mā txakabumiswē bika tenei itimaskai dakekubaīkāwē, ibubis ma kēmīswē taearā.

³³Ea Senhor Jeová ē ana matu yuii ea nīkakāwē. Matū txakabu matu pewakī keyutā matū mae tibi di iki txakabuni ana pewatā ha mae anu mā hiwekubaīshanūbū ē matu yunushanaii. ³⁴Mai pakea hanu matū ibubu hiwepaunibu anu bari itxapa tsua hanu hiweabumabiakē ha hanu hiweabuma anushū mā ana bai bena wakubaīshanaii. Tsuabura hanu kapukekī mā ha mae uruai matu uīshākanikiki. ³⁵Habu yuinamekī matukiri yuikī: ‘Na mairā, bari itxapa hanu tsua hiweabuma ibiani ikis dasibi hawēruahairaki, Éden anu Deusū bai hawērua wani keskarā. Hatū mae tibi berākī txakabuwakī keyutā henebainibu ikis ana pewatā mishki kenebaūkī keyutā hanu ma hiwekanikiki’, akī matu yuishākanikiki. ³⁶Hanushū ha nawabu matu dapi hiweabū ea unāshākanikiki. Ha mae berākī txakabuwaniibu ē ana matu bena wamai inū matū yunu bai betsekī txakabuwaniibu ē ana matu banamai kai haska bebūkiri ē txanini ē Senhor Deusū ē ma matu amai habū uīkī unāshākanikiki.

³⁷Ea Senhor Jeová ē hatukiri yuairā, Israelī enabū habū ea yukai binumakī ē hatu pehaira washūshanaii. Haburā, txashuwā shukua pamis

keska wakĩ yura itxapa ã hatu pawakubaĩshanaii. ³⁸Hanu besiaibutiã ea kēwākĩ hatũ txashuwã sheni ea kuashunũ ika hatũ txashuwã bekĩ Jerusalém anu itxawakĩ mata wamisbu keskai mae tibi berãbianibu anu ana yura itxapa itxashãkanikiki. Haskaibũ ea ã Senhor Deus kushipa hiwea ea unãti wakĩ shinãkubaĩshãkanikiki”, akĩ Senhor Deusũ ea yuia ã hatu yuishuniki.